



1872 PRIFYSGOL
ABERYSTWYTH
UNIVERSITY

Cymorth Ariannol a Gwobrau

Ysgoloriaethau a Bwrsariaethau ar gyfer ymgeiswyr o'r DU

Cynnwys

Arholiadau Mynediad – Ysgoloriaethau a Gwobrau Teilyngdod (cyfle i ennill hyd at £1,000 y flwyddyn a gwarant o le i astudio yn Aberystwyth)	4-7
Ysgoloriaethau Rhagoriaeth Academaidd (£2,000 i ymgeiswyr sy'n rhagori yn eu hastudiaethau cyn dechrau yn y Brifysgol)	8
Bwrsariaethau Ysgol Gwyddor Filfeddygol Aberystwyth (hyd at £2,400)	9
Bwrsariaethau Nyrsio (Bwrsariaethau Llety ar gyfer ymgeiswyr Nyrsio)	9
Gwobrau Adrannol (Amaeth, Cymraeg, Cyfrifiadureg, Ffiseg, Mathemateg)	10-11
Ysgoloriaethau Chwaraeon (£1,000 y flwyddyn a manteision eraill, ar gyfer unrhyw gynllun gradd)	12
Ysgoloriaethau Pêl-droed Prifysgol Aberystwyth/Tref Aberystwyth (£4,000 a manteision ychwanegol)	13
Bwrsariaethau i'r rhai sy'n Gadael Gofal, Gofalwyr Ifanc a Myfyrwyr sydd wedi'u dieithrio oddi wrth eu teuluoedd (£1,500 y flwyddyn a phecyn o gymorth ychwanegol)	14
Ysgoloriaethau Cerdd (£650 y flwyddyn a manteision eraill, ar gael ar gyfer unrhyw gynllun gradd)	15
Ysgoloriaethau Astudio trwy'r Gymraeg (hyd at £400 y flwyddyn ar gyfer astudio eich cwrs, neu ran o'ch cwrs, drwy gyfrwng y Gymraeg)	17
Ysgoloriaethau'r Coleg Cymraeg Cenedlaethol (Ysgoloriaethau ychwanegol am astudio drwy gyfrwng y Gymraeg)	17
Grant Cymdeithas y Cyn-fyfyrwyr (hyd at £1,500 ar gyfer ymgeiswyr o ardal De-ddwyrain Cymru)	18
Cyflogaeth a Chymorth Ychwanegol (GwaithAber a'r Gwasanaeth Cyngor, Gwybodaeth ac Arian)	19
Gwybodaeth Bwysig i'w nodi	20
Ysgoloriaethau, Bwrsariaethau a Gwobrau Trosolwg	22-23

Cyflwyniad

Gall astudio yn y brifysgol fod yn brofiad trawsnewidiol wrth i'ch dealltwriaeth o'ch pwnc ddyfnhau, ac wrth i chi wneud darganfyddiadau newydd a chwrrd â ffrindiau am oes. I nifer o fyfyrwyr, mae hefyd yn gyfnod o ddysgu byw'n annibynnol a rheoli cyllidebau.

Yn Aberystwyth rydym yn deall goblygiadau ariannol addysg uwch. Diolch i gefnogaeth hael cyn-fyfyrwyr a chyfeillion, rydym wedi gallu cynnig ysgoloriaethau ers 125 o flynyddoedd a mwy ac rydym yr un mor ymroddedig ag erioed i gefnogi ein myfyrwyr. Dyna'r rheswm dros roi pecyn hael o wobrau at ei gilydd a all eich helpu â chostau byw o ddydd i ddydd.

Nid ydym yn cyfyngu ar nifer y gwobrau y gallwch eu derbyn - cyn belled â'ch bod yn bodloni'r meini prawf, gallwch ddal sawl gwobr. Golyga hyn y gallwch gyfuno amrywiaeth o wobrau i wneud eich pecyn ariannol yn fwy gwerthfawr.

Mae gennym amrywiaeth o ysgoloriaethau a bwrsariaethau i fodloni gofynion pawb - a'r newyddion da yw, yn wahanol i fenthyciad myfyriwr, nid oes raid i chi dalu'r arian yn ôl. Mae gennym wobrau ac ysgoloriaethau i wobrwyo rhagoriaeth academaidd, bwrsariaethau i gynorthwyo myfyrwyr o gefndiroedd dan anfantais, gwobrau ar gyfer doniau chwaraeon a cherddorol, a chymelliannau i astudio drwy gyfrwng y Gymraeg.

Edrychwch i weld a allech chi elwa ar un neu fwy o'n gwobrau. Darllenwch drwy'r llyfryn i gael rhagor o wybodaeth a chysylltwch os oes gennych unrhyw gwestiynau.

**Yr Athro Elizabeth Treasure
Is-Ganghellor**



Arholiadau Mynediad: Ysgoloriaethau a Gwobrau Teilyngdod

Beth yw'r Arholiadau Mynediad?

Gwahoddir ymgeiswyr sydd am astudio unrhyw gynllun gradd israddedig yn Aberystwyth i sefyll **da**u Arholiad Mynediad er mwyn cystadlu am 3 lefel o wobrau: Ysgoloriaethau Prifysgol, Gwobrau Teilyngdod a Chynigion Diamod.

Ysgoloriaethau'r Brifysgol - £1,000 y flwyddyn

Mae gennym 50 o Ysgoloriaethau'r Brifysgol i'w dyfarnu i'r ymgeiswyr sy'n cael y marciau cyfunol uchaf yn y ddau bapur arholiad. Bydd ymgeiswyr llwyddiannus yn derbyn £1,000 ym mhob blwyddyn o'u cwrs. Mae enillwyr yr Ysgoloriaethau hyn hefyd yn cael gwarant o lety yn eiddo'r Brifysgol gydol eu cwrs, ynghyd â chynnig diamod i astudio ym Mhrifysgol Aberystwyth.

Gwobrau Teilyngdod - £1,000 yn y flwyddyn gyntaf

Rydym yn cynnig tua 100 o Wobrau Teilyngdod bob blwyddyn i fyfyrwyr sy'n gwneud yn dda yn yr arholiadau ond yn methu o drwch blewyn â chael Ysgoloriaeth. Bydd deiliaid Gwobrau Teilyngdod yn cael £1,000 yn ystod blwyddyn gyntaf eu cwrs, ynghyd â chynnig diamod i astudio ym Mhrifysgol Aberystwyth.

Cynigion Diamod

Gall perfformiad cryf yn yr Arholiadau Mynediad arwain at y Brifysgol yn cadarnhau lleoedd ymgeiswyr heb fwy o amodau gan arwain at gynnig diamod trwy UCAS. Mae'n bosib bydd ymgeiswyr sy'n colli allan ar wobr o drwch blewyn yn derbyn cynnig diamod ar sail perfformiad cryf yn yr Arholiadau.

Pynciau Arholiad

Rhaid sefyll yr Arholiadau Mynediad ar-lein mewn DAU o'r pynciau canlynol.

- Addysg ac Astudiaethau Plentynod
- Almaeneg
- Amaethyddiaeth a Chefn Gwlad
- Astudiaethau Ffilm a Theledu
- Astudiaethau Gwybodaeth
- Bioleg 1: Moleciwlau i Organau
- Bioleg 2: Micro-Organebau i Ecosystemau
- Busnes a Rheolaeth
- Celf - Portffolio
- Cemeg
- Cyfrifeg a Chyllid
- Cyfrifiadureg
- Cymdeithaseg
- Cymraeg (Iaith Fodern)
- Cymraeg (Iaith Gyntaf)
- Daeareg
- Daearyddiaeth Ddynol
- Daearyddiaeth Ffisegol
- Drama ac Astudiaethau Theatr
- Economeg
- Ffiseg
- Ffotograffiaeth - Portffolio
- Ffrangeg
- Gwleidyddiaeth
- Gwleidyddiaeth Ryngwladol
- Gwyddor Anifeiliaid a Cheffylau
- Gwyddor Chwaraeon ac Ymarfer Corff
- Gwyddor yr Amgylchedd
- Hanes Celf
- Hanes - Ynysoedd Prydain
- Hanes - Y Byd
- Mathemateg
- Mathemateg Bellach
- Saesneg: Llenyddiaeth
- Sbaeneg
- Seicoleg
- Technoleg Gwybodaeth
- Troseddeg
- Twristiaeth
- Y Gyfraith
- Ysgrifennu Creadigol (yn Saesneg)

Er mwyn cael eich ystyried ar gyfer gwobr a/neu gynnig diamod mae'n bwysig dewis papurau arholiad sy'n dderbyniol i'r Adran(nau) yr ydych wedi gwneud cais i astudio ynddi/ynddynt. Eich cyfrifoldeb chi yw sicrhau eich bod wedi dewis pynciau priodol, am ragor o wybodaeth ewch i'r dudalen Cwestiynau Cyffredin aber.ac.uk/arholiadau

I gael gweld disgrifiadau pellach o'r papurau arholiad a chyn bapurau, ewch i: aber.ac.uk/ysgoloriaethau/papurau



Am fwy o wybodaeth ac i ymgeisio, ewch i aber.ac.uk/arholiadau neu sganwch y côd QR.

Os ydych yn ymgeisio am gwrs sy'n cynnwys blwyddyn sylfaen ac yn ansicr am ba bynciau i'w dewis, cysylltwch â ni: ysgoloriaethau@aber.ac.uk

Sut i wneud cais

- Gallwch wneud cais yn hawdd drwy'r Ffurflen Gais ar ein gwefan. Dylech dderbyn ebost yn cadarnhau ar ol ymgeisio, cysylltwch os nad ydych yn derbyn yr ebost hwn. Rhestrir dyddiad cau ar gyfer ceisiadau ar ein gwefan ac ni chaiff ceisiadau hwyr eu hystyried.
- Cyn cyflwyno'ch ffurflen gais, rhaid cael caniatâd eich Swyddog Arholiadau a sicrhau eu bod yn fodlon ac yn gallu gwneud y trefniadau angenrheidiol.

Trefniadau Penodol

Fel arfer caiff ymgeiswyr cymwys 25% o amser ychwanegol, a'r un trefniadau ag yn eu harholiadau arferol yn yr ysgol/coleg.

Gweler ein polisi ar wneud addasiadau rhesymol ar gyfer ymgeiswyr sy'n sefyll yr Arholiadau Mynediad, sydd ar ein gwefan.

Lle y cynhelir yr arholiadau

- Yn eich Ysgol neu Goleg yn y DU. Cysylltwch os nad yw eich Ysgol neu Goleg yn gallu cynnal yr arholiadau.
- Tu allan i'r DU mewn ysgol ryngwladol, neu Swyddfeydd y Cyngor Prydeinig.

Cyfrifoldeb yr ymgeisydd fydd cysylltu â'i Swyddog Arholiadau **cyn** diwrnod yr arholiadau i sicrhau bod y trefniadau priodol wedi'u gwneud (ynghŷn ag ystafell yr arholiad, goruchwylio ac ati). Ni fydd modd unioni camgymeriadau a ddaw i sylw'r Brifysgol ar ôl amserlen yr arholiadau.

Sylwer: Er bod yn rhaid i chi fod wedi gwneud cais i astudio ym Mhrifysgol Aberystwyth erbyn y dyddiad cau, nid oes rhaid i chi gael cynnig gennym cyn i chi sefyll yr Arholiadau.

Trefn yr Arholiadau

Cynhelir yr arholiadau ar-lein a bydd angen defnydd o gyfrifiadur eich ysgol/coleg gyda Microsoft Word, cysylltiad â'r rhyngwyd, a phorwr gwe Chrome (neu Firefox) er mwyn cael mynediad at y papurau arholiad a'u cyflwyno. Byddwch chi, a'ch ysgol/coleg, yn derbyn cyfarwyddiadau llawn. Yr eithriad yw:

- Mathemateg a Mathemateg Bellach, lle bydd angen eu lawrlwytho, eu cwblhau ar bapur, eu sganio ac i'r Swyddog Arholiadau eu e-bostio at ysgoloriaethau@aber.ac.uk.

Ymgeiswyr Hŷn

Croesewir ceisiadau gan ymgeiswyr hŷn, ond sylwer na chaiff ymgeiswyr fod wedi bod yn fyfyrwyr gradd yn unrhyw brifysgol am fwy nag un semester unrhyw bryd yn y gorffennol.

Gohirio Mynediad

Os ydych yn bwriadu gohirio eich cais i'r Brifysgol cewch sefyll yr arholiadau a gohirio unrhyw ddyfarniad law yn llaw â'ch mynediad gohiriedig i'r Brifysgol. Cewch hefyd ddewis sefyll yr arholiadau yn ystod eich blwyddyn allan.

Canlyniadau

Caiff y canlyniadau eu hanfon at ymgeiswyr a'u Swyddogion Arholiadau oddeutu 4-6 wythnos ar ôl yr arholiadau.

Talu'r Gwobrau

Telir eich arian yn syth i'ch banc drwy BACS mewn dau randaliad ym mhob blwyddyn gymwys - y cyntaf ddechrau mis Rhagfyr, a'r ail ddechrau mis Mawrth. Yn ystod y flwyddyn gyntaf yn unig y gwneir taliadau'r Gwobrau Teilyngdod.

Gwybodaeth ar gyfer Ysgolion a Cholegau

Ceir gwybodaeth am drefniadau'r arholiadau a'r hyn sy'n ofynnol gan Swyddogion Arholiadau ar ein gwefan: aber.ac.uk/ysgoloriaethau/ysgolion

Anfonir deunyddiau'r arholiadau at y Swyddog Arholiadau enwebedig oddeutu wythnos cyn yr arholiadau.

Ni chodir tâl am sefyll yr Arholiadau Mynediad, ond ni fydd y Brifysgol yn gallu cyfrannu at unrhyw gostau goruchwylio neu archebu ystafelloedd. Bydd trefniadau arholiadau arferol yn berthnasol.

Gweler y wefan am Delerau ac Amodau llawn ar gyfer yr Arholiadau Mynediad: aber.ac.uk/mynediad-teilyngdod

Elen Haf Roach

Cymraeg Proffesiynol
Gwobr Teilyngdod, Ysgoloriaeth Rhagoriaeth Academaidd
Hwlfordd, Sir Benfro



“ Er bod yr Arholiadau Mynediad yn heriol, roeddynt yn ymarfer da ar gyfer fy arholiadau Safon Uwch. Roeddwn yn teimlo anrhydedd mawr wrth ennill Gwobr Teilyngdod. Yna, oherwydd fy nghanlyniadau Safon Uwch, cefais Ysgoloriaeth Rhagoriaeth Academaidd hefyd - doedd dim angen hyd yn oed ymgeisio am yr ysgoloriaeth hon. Rwy'n defnyddio'r arian ar gyfer prynu gwerslyfrau ac ymuno â gweithgareddau UMCA.”



Ysgoloriaethau Rhagoriaeth Academaidd

£2,000

Er mwyn gwobrwyo rhagoriaeth academaidd a gyflawnwyd cyn dechrau yn y Brifysgol, mae'n bleser gennym gynnig Ysgoloriaethau Rhagoriaeth Academaidd gwerth £2,000 yn y flwyddyn gyntaf o astudio i ymgeiswyr o'r DU sy'n cael o leiaf:

- Graddau AAA yn yr arholiadau Safon Uwch*;
- DDD yn y BTEC Diploma Estynedig Lefel 3;
- 34 pwynt yn y Fagloriaeth Ryngwladol;
- Ystyrir cymwysterau ychwanegol sy'n cyfateb i 144 o bwyntiau tariff UCAS.

Nid oes raid gwneud cais, bydd y gwobrau'n cael eu clustnodi'n awtomatig i'r myfyrwyr cymwys.

* Mae'n bosibl y derbynnir gradd A yn Niploma Uwch Bagloriaeth Cymru, a fydd yn cynnwys y Dystysgrif Her Sgiliau Uwch, yn lle un o'r graddau Safon Uwch.

Ffion Evans

Daearyddiaeth
Gwobr Teilyngdod, Ysgoloriaeth Rhagoriaeth Academaidd, Ysgoloriaeth Astudio trwy'r Gymraeg
Llanybydder, Ceredigion

“ Dwi wedi bod yn ddigon ffodus i dderbyn sawl ysgoloriaeth. Rwyf yn hynod falch o gael derbyn yr arian sydd wedi bod yn help gyda chostau byw cyffredinol ac wedi fy ngalluogi i brynu deunyddiau addysgol. Roedd hi'n hawdd i ymgeisio am yr ysgoloriaethau ac mi fydden i yn annog unrhyw un i wneud hynny.”

Bwrsariaethau Ysgol Gwyddor Filfeddygol Aberystwyth

hyd at £2,400

Mae ymgeiswyr am y cwrs Milfeddygaeth (BVSc) yn dilyn llwybr penodol ar gyfer bwrsariaethau. Mae'n bleser felly gennym gynnig y canlynol:

- Bwrsariaethau Cyflawniad - i fyfyrwyr sy'n dangos y gallant gyflawni'n academaidd a dangos arweiniad a gwasanaeth y tu allan i amgylchedd academaidd ar yr un pryd;
- Bwrsariaethau Gweledigaeth - i fyfyrwyr sydd wedi cyflawni'n helaeth ac a all fynegi gweledigaeth glir ar gyfer datrys heriau sy'n wynebu'r proffesiwn milfeddygol yng Nghymru;
- Bwrsariaethau Sbardun - agored i ymgeiswyr am radd Milfeddygaeth a gafodd eu haddysg uwchradd yng Nghymru;
- Bwrsariaethau Astudio trwy gyfrwng y Gymraeg - i fyfyrwyr sy'n astudio 5 credyd neu fwy trwy gyfrwng y Gymraeg;

- Bwrsariaethau sy'n dibynnu ar brawf modd, yn seiliedig ar asesiad o incwm yr aelwyd;
- Bwrsariaethau Dwyieithog Astudiaethau Efrydiau Allanol (EMS) - i fyfyrwyr sy'n gwneud lleoliad gwaith mewn amgylchedd Cymraeg neu ddwyieithog Cymraeg/Saesneg am o leiaf 6 wythnos.

Anogir myfyrwyr i ymgeisio am gynifer o fwrsariaethau ag y dymunant ond mae'r Brifysgol yn cadw'r hawl i flaenoriaethu ceisiadau gan fyfyrwyr a fu'n aflwyddiannus yn flaenorol.

Mae myfyrwyr sy'n cofrestru ar y cwrs Milfeddygaeth (BVSc) hefyd yn cael manteisio ar y gwasanaethau a gynigir gan ein Gwasanaeth Cymorth i Fyfyrwyr a Gyrfaodd, yn cynnwys y Gronfa Caledi.

Bwrsariaethau Nyrsio

£3,500

Rydym yn falch o gynnig 2 Fwrsariaeth Llety i ymgeiswyr i'n cyrsiau BSc Nyrsio Oedolion a BSc Nyrsio Iechyd Meddwl.

Bydd y fwrsariaeth yn rhoi gostyngiad o £3,500 oddi ar gost llety mewn eiddo prifysgol ar gyfer y flwyddyn gyntaf o astudio.

Rhaid i ymgeiswyr fod yn byw mewn mannau penodol yng Nghymru (gweler y wefan am fanylion).



Gwobrau Adrannol

Y mae nifer o'n hadrannau academaidd yn cynnig Gwobrau Adrannol, a gallwch ddal y rhain yn ogystal â nifer o'n Gwobrau eraill. Manylion llawn a'r ffurflenni cais i'w gweld yn: aber.ac.uk/ysgoloriaethau

Adran Cyfrifiadureg

Ysgoloriaethau Adrannol i astudio Cyfrifiadureg

Anrhydedd Sengl: £500 y flwyddyn
Anrhydedd Cyfun: £250 y flwyddyn

Mae hyd at dair ysgoloriaeth ar gael i fyfyrwyr sy'n ennill graddau rhagorol yn yr Arholiadau Mynediad, neu sydd wedi llwyddo i gael graddau rhagorol (A*) yn eu harholiadau Safon Uwch neu gymwysterau cyfatebol. Gwerth y wobwr yw £500 y flwyddyn gydol eich cwrs gradd (tair neu bedair blynedd).

Er mwyn parhau i dderbyn y wobwr rhaid i chi gael 70% neu fwy ar gyfartaledd yn eich arholiadau bob blwyddyn. Mae myfyrwyr anrhydedd cyfun yn gymwys i gael £250 y flwyddyn.

I gael rhagor o fanylion, cysylltwch â'r Adran Cyfrifiadureg: cs-admissions@aber.ac.uk

Adran Mathemateg

Ysgoloriaethau Adrannol i astudio Mathemateg

Anrhydedd Sengl: £500 y flwyddyn
Prif bwnc cwrs Prif bwnc/Is-bwnc: £500 y flwyddyn
Anrhydedd Cyfun: £250 y flwyddyn

I fod yn gymwys, mae'n rhaid i ymgeisydd naill ai ennill Ysgoloriaeth Mynediad y Brifysgol, neu lwyddo i gael gradd A* yn eu harholiadau Safon Uwch mewn Mathemateg. Gwerth y wobwr yw £500 y flwyddyn ar gyfer ymgeiswyr am gyrsiau anrhydedd sengl a chysiau prif/is-bwnc (gyda mathemateg yn brif bwnc), a £250 y flwyddyn i ymgeiswyr am gyrsiau anrhydedd cyfun. Dyfernir y wobwr yn awtomatig i fyfyrwyr sy'n cyflawni'r meini prawf uchod, a chedwir y wobwr os ydych yn llwyddo i gael cyfartaledd o 70% neu uwch yn eich modiwlau Mathemateg bob blwyddyn.

I gael rhagor o fanylion, cysylltwch â'r Adran Mathemateg: maths-admissions@aber.ac.uk

Adran Ffiseg

Ysgoloriaethau Adrannol i astudio Ffiseg

Anrhydedd Sengl: £500 y flwyddyn
Anrhydedd Cyfun: £250 y flwyddyn

I fod yn gymwys, mae'n rhaid i ymgeisydd naill ai ennill Ysgoloriaeth Mynediad y Brifysgol, neu lwyddo i gael o leiaf dwy radd A yn eu Safon Uwch, a rhaid i un ohonynt fod mewn Ffiseg neu Fathemateg. Gwerth y wobwr yw £500 y flwyddyn am gyfnod eich cwrs (tair/pedair blynedd).

Gallwch gadw'r wobwr os ydych yn llwyddo i gael cyfartaledd o 70% neu uwch yn arholiadau eich modiwlau bob blwyddyn. Mae myfyrwyr anrhydedd cyfun yn gymwys i gael £250 y flwyddyn. I gael rhagor o fanylion, cysylltwch â'r Adran Ffiseg: phys@aber.ac.uk



Ysgoloriaeth Amaeth y CLA a Phrifysgol Aberystwyth

£3,000 dros gyfnod y cwrs

Mae Ymddiriedolaeth Elusennol y Gymdeithas Tirfeddianwyr Cefn Gwlad (CLA) yn cynnig hyd at 2 ysgoloriaeth i gefnogi myfyrwyr sy'n dymuno gwneud cais i astudio cyrsiau Amaethyddol ym Mhrifysgol Aberystwyth. Mae Ymddiriedolaeth Elusennol y CLA yn arbennig o awyddus i gefnogi unigolion sy'n gallu dangos diddordeb nodedig mewn Polisi Amaethyddol a materion eraill a fydd yn llywio dyfodol y diwydiant amaethyddol ledled Cymru a'r DU.

Bwrsariaeth Margaret Evelyn "Lynne" Williams

£500 yn y flwyddyn gyntaf

Bwrsariaeth o £500 yn y flwyddyn gyntaf i hyd at ddau ymgeisydd i Adran y Gymraeg ac Astudiaethau Celtaidd. Rhaid i ymgeiswyr fod wedi mynychu'r ysgol uwchradd yng Ngheredigion, Sir Gâr neu Abertawe.

Ysgoloriaeth Emily Price

£500 yn y flwyddyn gyntaf

Sefydlwyd yr Ysgoloriaeth hon gan deulu a ffrindiau cyn-fyfyrwraig, Emily Price, i wobrwyo merched sy'n ymgeisio am gyrsiau Mathemateg a Ffiseg (yn cynnwys anrhydedd cyfun Mathemateg/Ffiseg) yn Aberystwyth. Bydd yr ymgeisydd llwyddiannus yn dangos addewid academaidd a brwdfrydedd ar gyfer cynyddu nifer y merched sy'n astudio Mathemateg a/ neu Ffiseg. Telir yr Ysgoloriaeth yn ystod y flwyddyn astudio gyntaf.

Bwrsariaeth Waldo Williams

£500 yn y flwyddyn gyntaf

Bwrsariaeth o £500 yn y flwyddyn gyntaf i hyd at ddau ymgeisydd i Adran y Gymraeg ac Astudiaethau Celtaidd. Mae'r Fwrsariaeth yn agored i siaradwyr Cymraeg iaith gyntaf ac ail iaith ac mae'n seiliedig ar gyflwyno darn o waith sy'n gysylltiedig â gwaith Waldo Williams.

Ysgoloriaethau Chwaraeon £1,000 y flwyddyn

Anelir yr Ysgoloriaethau Chwaraeon at fyfyrwyr sydd fel arfer yn byw yn y DU/UE ac sy'n gallu dangos tystiolaeth o gyflawniadau diweddar o safon uchel ym maes chwaraeon ac ymrwymiad i ddatblygu perfformiad.

Fel rhan o'n hymrwymiad i gefnogi athletwyr medrus iawn i sicrhau cydbwysedd rhwng chwaraeon ac astudio, rydym wedi nodi rhai 'chwaraeon ffocws' allweddol lle gallwn gynnig arbenigedd penodol.

Wrth ddatblygu nifer o bartneriaethau cyffrous gydag arbenigwyr yn eu maes, gallwn hwyluso mynediad i addysg hyfforddi arbenigol a chyfleusterau o'r radd flaenaf ar gyfer y chwaraeon hyn yn agos at Aberystwyth:

- Pêl-droed;
- Beicio mynydd;
- Pêl-rwyd;
- Rygbi;
- Cerdyn Gwyllt - os ydych yn rhagori mewn camp wahanol, y gallwn ei hwyluso yma yn y Brifysgol, efallai fod opsiwn y Cerdyn Gwyllt yn addas i chi.

Mae Ysgoloriaethau Chwaraeon ar gael i fyfyrwyr sy'n gwneud cais am UNRHYW bwnc amser llawn yn Aberystwyth a gellir ei gyfuno gyda unrhyw Ysgoloriaeth arall.

Mae'r manteision yn cynnwys:

- £1,000 y flwyddyn (hyd at 5 ar gael bob blwyddyn);
- Rhaglen gymorth wedi'i theilwra yn benodol i'ch camp;
- Aelodaeth Blatinwm rad ac am ddim yng Nghanolfan Chwaraeon y Brifysgol am bob blwyddyn astudio.



Gellir cael hyd i fanylion llawn a'r ffurflen gais ar-lein yma: aber.ac.uk/ysgoloriaeth/chwaraeon

Gwobrau Teilyngdod Chwaraeon £500

Os ydych yn rhagori yn eich maes chwaraeon ar ôl cyrraedd Prifysgol Aberystwyth, gallech wneud cais ar gyfer Gwobr Teilyngdod Chwaraeon yn eich ail flwyddyn neu flwyddyn astudio ddilynol. £500 yw gwerth y gwobrau, ac aelodaeth Blatinwm yn rhad ac am ddim yng Nghanolfan Chwaraeon y Brifysgol am flwyddyn academaidd. Bydd myfyrwyr cymwys yn derbyn gwybodaeth yn uniongyrchol.

Ysgoloriaethau Pêl-droed Prifysgol Aberystwyth / Tref Aberystwyth £4,000

Gwahoddir ceisiadau gan ymgeiswyr o'r DU sy'n gwneud cais i astudio'n llawn-amser ar gyfer gradd mewn unrhyw bwnc (israddedig neu uwchraddedig). Bydd ymgeiswyr llwyddiannus yn chwarae i Glwb Pêl-droed Tref Aberystwyth neu Glwb Pêl-droed Menywod Aberystwyth yn Uwch-gynghrair Cymru a hefyd i dîm pêl-droed BUCS Prifysgol Aberystwyth pan fo'n briodol.

RHAID bod ymgeiswyr wedi cyrraedd safon chwarae yn Uwch-gynghrair Cymru neu safon gyfatebol o leiaf (Cynghrair Genedlaethol Vanarama yn Lloegr).

Ymhlith y manteision y mae:

- £4,000 yn ystod y flwyddyn gyntaf;
- Aelodaeth Blatinwm o Ganolfan Chwaraeon Prifysgol Aberystwyth yn rhad ac am ddim;
- Cyfleoedd datblygu hyfforddiant pêl-droed gyda Chlwb Pêl-droed Tref Aberystwyth ac Undeb Myfyrwyr Prifysgol Aberystwyth (UM PA);
- Yswiriant meddygol drwy UM PA;

- Mynediad at ffisiotherapi Clwb Pêl-droed Tref Aberystwyth;
- Citiau gemau a hyfforddiant Clwb Pêl-droed Tref Aberystwyth.



Gellir cael hyd i fanylion llawn a'r ffurflen gais ar-lein yma: aber.ac.uk/ysgoloriaeth/atfc

Mae croeso i ymgeiswyr gysylltu â'r Clwb er mwyn trafod yr Ysgoloriaeth ymhellach: abertownfc@live.co.uk

Ni ellir dal yr Ysgoloriaeth hon ac Ysgoloriaeth Chwaraeon Prifysgol Aberystwyth, ond gellir ei dal gydag unrhyw un o'r gwobrau israddedig eraill a gynigir. Cynghorir ymgeiswyr uwchraddedig i gadarnhau drwy'r Swyddfa Derbyn Graddedigion a fyddai effaith ar unrhyw wobrau Uwchraddedig.



Mathew Jones

Gwyddor Chwaraeon ac Ymarfer Corff
Ysgoloriaeth Pêl-droed Prifysgol Aberystwyth /
Tref Aberystwyth, Ysgoloriaeth Rhagoriaeth Academaidd
Aberystwyth



“Byddwn yn argymhell bod unrhyw bêl-droedwyr dawnus sydd â diddordeb mewn dod i astudio yn Aber yn gwneud cais am Ysgoloriaeth Clwb Pêl-droed Aber. Roedd y broses ymgeisio yn syml, ac mae derbyn yr Ysgoloriaeth wedi helpu i dynnu'r straen allan o ariannu fy amser yn y Brifysgol, a gallu parhau i chwarae pêl-droed i safon uchel.”

Bwrsariaethau i'r rhai sy'n Gadael Gofal, Gofalwyr Ifanc a Myfyrwyr sydd wedi'u dieithrio o'u teuluoedd £1,500 y flwyddyn

Mae Prifysgol Aberystwyth yn ymwybodol o'r anawsterau ariannol a wynebwr gan fyfyrwyr sy'n mynd ymlaen i addysg uwch a fu mewn gofal, neu'r rhai a chanddynt gyfrifoldebau gofalu, neu sydd wedi'u dieithrio oddi wrth eu teuluoedd neu eu gwarcheidwaid. Er mwyn lleddfu'r pwysau ariannol, mae'n dda gennym gynnig cymorth ariannol o £1,500 y flwyddyn, ynghyd â phhecyn cymorth helaeth ar gyfer myfyrwyr cymwys. Mae'r pecyn yn cynnwys:

- cyfraniad tuag at gostau teithio os byddwch yn ymweld â ni;
- cynnig yn is na'n cynnig safonol;
- mynediad i'n Cronfa Caledi;
- gwarant o lety yn llety'r Brifysgol am 52 wythnos o'r flwyddyn (yn ôl yr angen);
- pecyn croeso pan fyddwch yn cyrraedd, yn cynnwys hanfodion fel dillad gwely ac offer cegin;
- mentor i gefnogi'ch cyfnod pontio o'r ysgol i'r Brifysgol;
- cyngor gyrfaoedd a phrofiad gwaith;
- gostyngiad oddi ar y ffioedd dysgu os ydych yn parhau i astudio ar gwrs uwchraddedig yn Aberystwyth yn syth ar ôl graddio.

Ceir manylion llawn am wneud cais, y dystiolaeth ategol sydd ei hangen arnom, a ffurflen gais ar ein gwefan: aber.ac.uk/ymadawryrgofal

Gallwch hefyd anfon e-bost atom: ehangu-cyfranogiad@aber.ac.uk

Gellir dal y fwsariaeth yma ar y cyd ag unrhyw wobwr arall.

Ysgoloriaethau Cerdd

£650 y flwyddyn

Rydym yn gwerthfawrogi pwysigrwydd bwrlwm y gymuned gerddorol. Rydym yn cynnig cyfle i bob myfyriwr chwarae, dysgu a mwynhau cerddoriaeth ochr yn ochr â'u hastudiaethau.

Rhodri Ysgoloriaethau Cerdd (4 ar gael bob blwyddyn) i gerddorion profiadol a all wneud cyfraniad ymarferol i gerddorfeydd, bandiau, corau ac ensembles y Brifysgol.

Manteision:

- Aelodaeth rad ac am ddim o'r holl ensembles cerddorol (gan gynnwys cerddorfeydd, bandiau ac ati);
- Cyfle i ddefnyddio adnoddau ymarferol a llyfrgell ac adnoddau priodol eraill yn rhad ac am ddim.

Sut i ymgeisio:

- Rhaid ymgeisio i'r Brifysgol a nodi Aberystwyth fel dewis cadarn;
- Rhaid i ymgeiswyr a gaiff wahoddiad fod ar gael am glyweliad ar adeg sy'n gyfleus i bawb;
- Mae'r Ysgoloriaethau ar gael i offerynwyr a chantorion cymwys o bob gwlad, yn unol â'r hyn a nodir yn y rheoliadau.

Ceir manylion llawn, gan gynnwys sut i wneud cais, ar ein gwefan aber.ac.uk/cy/music neu drwy gysylltu â: music@aber.ac.uk

Rhodri Rutherford

Philomusica a Chantorion y Brifysgol
Ysgoloriaeth Gerdd - Clarinet a Llais

“ Mae derbyn yr Ysgoloriaeth Gerdd wedi bod yn brofiad anhygoel i mi. Dwi wedi cael y cyfle i chwarae nifer helaeâth o ddarnau cerddorol gan amryw o gyfansoddwyr. Yn ogystal, mae fy sgiliau darllen a chwarae cerddoriaeth wedi datblygu wrth i mi fagu hyder.

Mae'r Ganolfan Gerdd yn darparu ystod eang o grwpiau cerddorol, gyda rhywbeth at ddant pawb. Mae'r teimlad o ymuno â chymuned gerddorol yn un hyfryd gan eich bod yn cwrdd â phobl sy'n rhannu'r un diddordebau a phrofiadau. Mae'n ffordd arbennig o dda o gael seibiant o'r cwrs i ymlacio a mwynhau. Mae hefyd yn sicrhau cydbwysedd amser o ran bywyd prifysgol, sy'n allweddol.”





Ysgoloriaethau Astudio trwy'r Gymraeg

hyd at £400 y flwyddyn


Mae cynnydd sylweddol yn y galw am sgiliau iaith Gymraeg yn y gweithle yng Nghymru.

Er mwyn annog mwy o'n myfyrwyr i fanteisio ar y cyfle i ddysgu a datblygu'r sgiliau hyn, rydym yn cynnig Ysgoloriaethau i'r rhai sy'n dilyn o leiaf ran o'u cwrs drwy gyfrwng y Gymraeg.

Dyfernir Ysgoloriaethau'n awtomatig i fyfyrwyr cymwys. Bydd manylion y modiwlau cymwys ar gael wrth gofrestru ar ddechrau pob blwyddyn academaidd.

- £400 i fyfyrwyr sy'n astudio 85+ o gredydau trwy gyfrwng y Gymraeg;
- £350 i fyfyrwyr sy'n astudio 65-84 o gredydau trwy gyfrwng y Gymraeg;
- £300 i fyfyrwyr sy'n astudio 45-64 o gredydau trwy gyfrwng y Gymraeg;
- £250 i fyfyrwyr sy'n astudio 25-44 o gredydau trwy gyfrwng y Gymraeg;
- £200 i fyfyrwyr sy'n astudio 5-24 o gredydau trwy gyfrwng y Gymraeg.

Ysgoloriaethau'r Coleg Cymraeg Cenedlaethol



Corff annibynnol yw'r Coleg Cymraeg Cenedlaethol, sy'n gyfrifol am gynllunio a chyllido darpariaeth cyfrwng Cymraeg o fewn y sector addysg uwch gyfan mewn partneriaeth â holl brifysgolion Cymru.

Mae'r Coleg yn cynnig Ysgoloriaethau er mwyn rhoi cymorth ariannol i fyfyrwyr sy'n dymuno astudio trwy gyfrwng y Gymraeg. Rhaid ymaelodi â'r Coleg i wneud cais. Ewch i wefan y Coleg i gael mwy o fanylion. Mae'n bosibl dal Ysgoloriaeth o'r Coleg Cymraeg Cenedlaethol ar y cyd ag unrhyw wobrau o Brifysgol Aberystwyth.

Gweler: colegcymraeg.ac.uk



Cyflogaeth a Chymorth Ychwanegol

GwaithAber

Mae'r cyfleoedd am waith rhan-amser, achlysurol drwy GwaithAber yn amrywio o arlwy a gwaith gweinyddol, i waith llysgenhadol a mwy. Yn ystod y tymor, os oes gwaith ar gael, gallwch ddewis gweithio hyd at 15 awr yr wythnos, a rhagor o oriau'n bosibl yn ystod y gwyliau. Gallai'r gwaith fod wedi'i leoli ar unrhyw un o gampysau'r Brifysgol gan gynnwys yr Hen Goleg a'n Ffermydd.

Yr hyn sy'n wych am y cynllun yw eich bod yn gallu derbyn gwaith sy'n cyd-fynd â'ch amserlen chi, felly nid yw'n tarfu ar eich astudiaethau, ond fe fyddwch chi'n parhau i feithrin profiad a chael arian ychwanegol.

aber.ac.uk/gwaithaber

Y Gwasanaeth Cyngor, Gwybodaeth ac Arian

Mae'r Gwasanaeth Cyngor, Gwybodaeth ac Arian o fewn y Gwasanaethau Cymorth i Fyfyrrwyr yn rhoi cyngor arbenigol am amrywiaeth o faterion ariannol. Bydd modd i'n hymgyngorwyr myfyrrwyr, sydd wedi'u hachredu gan NASMA (Cymdeithas Genedlaethol Cyngorwyr Ariannol Myfyrrwyr), wneud yn siŵr eich bod yn cael popeth o fewn eich hawliau gan eich corff cyllido. Gallant hefyd roi cyngor ar sut i reoli eich arian yn fwy effeithiol ac efallai y bydd modd iddynt roi cymorth ariannol ar gyfer amgylchiadau annisgwyl.

aber.ac.uk/cy/student-support

Cymdeithas y Cyn-fyfyrrwyr, Aberystwyth (Cangen Caerdydd) hyd at £1,500

Grant gwerth rhwng £500 a £1,500, sy'n daladwy mewn dau swm cyfartal ym mlwyddyn academaidd gyntaf y myfyriwr yn Aberystwyth. Croesewir ceisiadau gan fyfyrwyr sy'n ddisgyblion mewn ysgol neu goleg yn ardal de-ddwyrain Cymru.

Anfonir manylion pellach at ymgeiswyr cymwys erbyn canol mis Mawrth.



Gwybodaeth bwysig i'w nodi:

1. Mae'n bosibl dal Ysgoloriaeth Mynediad neu Wobr Teilyngdod ynghyd ag unrhyw un, neu bob un, o'n gwobrau eraill.
2. Mae i bob Ysgoloriaeth a Bwrsariaeth eu telerau ac amodau eu hunain, sydd ar gael yma: aber.ac.uk/ysgoloriaethau
3. Bydd myfyrwyr sy'n gohirio mynediad yn derbyn Ysgoloriaethau/Bwrsariaethau ar y lefel a hysbysebwyd ar gyfer y flwyddyn gais.
4. Mae'r gwobrau'n daladwy i fyfyrwyr sy'n astudio ar gyfer gradd lawn yn unig (nid i'r sawl sydd wedi trosglwyddo i flynyddoedd 2 neu 3 o'r cwrs).
5. Bydd y taliadau'n para tra bydd myfyriwr yn dal y wobr, yn amodol ar fodloni'r rheoliadau (os bydd blwyddyn yn cael ei hail-wneud ni wneir taliadau, ac eithrio Bwrsariaeth Aberystwyth).
6. Dim ond yn y blynyddoedd pan fo'r myfyriwr yn talu ffoedd llawn y caiff taliadau Ysgoloriaethau a Bwrsariaethau eu gwneud (ni fydd taliadau'n cael eu gwneud yn ystod blynyddoedd tramor fel rhan o'r cwrs neu yn ystod blynyddoedd mewn diwydiant).
7. Fel arfer, gwneir taliadau ddwywaith y flwyddyn yn syth i gyfrifon banc y myfyrwyr. Cyfrifoldeb y myfyrwyr unigol yw darparu manylion dilys y banc pan ofynnir iddynt amdanynt. Os nad ydynt yn rhoi'r manylion hynny erbyn y dyddiad penodedig, ni fydd yr arian yn cael ei dalu. Os na ddarperir manylion cyfrif banc erbyn y dyddiad penodedig, ni fydd gan ddeiliad y grant hawl i dderbyn taliad y flwyddyn honno. Gall taliadau blynyddoedd diweddarach barhau os bydd deiliad y grant yn darparu manylion ei gyfrif banc erbyn y dyddiadau penodedig ar gyfer y blynyddoedd hynny.
8. Bydd taliadau i fyfyrwyr sy'n tynnu'n ôl dros dro yn ailgychwyn o ddechrau'r tymor llawn nesaf pan ailgychwynnant ar eu hastudiaethau (ni fydd unrhyw daliadau sy'n weddill o'r tymor pan dynnant yn ôl yn cael eu talu).
9. Mae'n bwysig cofio, os y byddwch mewn dyled i'r Brifysgol, y bydd taliadau'r Ysgoloriaeth neu Fwrsariaeth yn cael eu dal yn ôl a'u defnyddio yn erbyn y ddyled.
10. Os bydd myfyriwr yn tynnu'n ôl o'u hastudiaethau am byth cyn Rhagfyr 1af, bydd y Swyddfa Gyllid yn hawlio'r cyfan o'r taliad cyntaf yn ôl. Os bydd myfyriwr yn tynnu'n ôl am byth rhwng Rhagfyr 1af a Mawrth 2il, bydd y Swyddfa Gyllid yn hawlio yn ôl y cyfan o'r ail daliad. O dan yr amgylchiadau hyn, os nad yw'r symiau yn cael eu had-dalu, mae'n bosibl y bydd yr achos yn cael ei gyfeirio at asiantaeth casglu dyledion y Brifysgol.
11. Mae'r wybodaeth a geir yn y llyfryn hwn yn berthnasol i fyfyrwyr a fydd yn ymgymryd â'u hastudiaethau yn Aberystwyth yn unig, ac nid yw'n berthnasol i fyfyrwyr sy'n astudio rhaglenni breiniol neu raglenni wedi'u dilysu a gyflwynir gan bartneriaid.



Ysgoloriaethau, Bwrsariaethau a Gwobrau

Rydym yn cynnig ystod hael o Ysgoloriaethau a Bwrsariaethau i gefnogi'ch costau astudio a byw. Mae'n bosibl dal nifer o'r gwobrau hyn gyda'i gilydd i wneud eich pecyn ariannol chi'n fwy gwerthfawr.



Enw'r Wobr	Gwerth	Pwy all ymgeisio?	Meini Prawf	Ffurflen gais
Ysgoloriaeth Prifysgol	<ul style="list-style-type: none"> Hyd at £1,000 y flwyddyn; Cynnig diamod. 	Ymgeiswyr Israddedig	<ul style="list-style-type: none"> Rhaid sefyll dau arholiad mewn dau bapur gwahanol; Cynhelir yr arholiadau ym mis Chwefror a rhaid eu sefyll mewn ysgol neu goleg yn y DU, neu mewn canolfan arholi achrededig. 	Oes
Gwobrau Teilyngdod	<ul style="list-style-type: none"> £1,000 yn y flwyddyn gyntaf; Cynnig diamod. 			
Ysgoloriaethau Rhagoriaeth Academaidd	<ul style="list-style-type: none"> £2,000 yn y flwyddyn gyntaf 	Ymgeiswyr o'r DU	Ymgeiswyr a gafodd ganlyniadau rhagorol cyn dechrau yn y Brifysgol	Nac oes
Bwrsariaethau Ysgol Gwyddor Filfeddygol Aberystwyth	<ul style="list-style-type: none"> Hyd at £2,400 	Ymgeiswyr i Ysgol Gwyddor Filfeddygol Aberystwyth	Gweler y tudalennau gwe perthnasol	Oes
Bwrsariaethau Llety Nyrsio	<ul style="list-style-type: none"> Llety yn eiddo'r brifysgol yn eich blwyddyn gyntaf 	Ymgeiswyr am gyrsiau Nyrsio Oedolion a Nyrsio Iechyd Meddwl	Rhaid byw mewn ardal benodol o Gymru. Cynigir y Bwrsariaethau i'r myfyrwyr cymwys cyntaf sy'n cadarnhau eu lle ar y cwrs.	Nac oes
Gwobrau Adrannol	<ul style="list-style-type: none"> £250 - £1,000 y flwyddyn 	Ymgeiswyr ar gyfer Amaeth, y Gymraeg, Cyfrifiadureg, Ffiseg, a Mathemateg	Gweler y tudalennau gwe perthnasol	


Enw'r Wobr	Gwerth	Pwy all ymgeisio?	Meini Prawf	Ffurflen gais
Ysgoloriaeth Emily Price	<ul style="list-style-type: none"> £500 	Ymgeiswyr benywaidd ar gyfer Mathemateg/ Ffiseg sy'n dangos addewid academaidd ac angerdd am eu pwnc		Oes
Bwrsariaeth Margaret Evelyn "Lynne" Williams	<ul style="list-style-type: none"> £500 	Ymgeiswyr i Adran y Gymraeg ac Astudiaethau Celtaidd (sy'n dod o Geredigion, Sir Gâr neu Abertawe)		Oes
Bwrsariaeth Waldo Williams	<ul style="list-style-type: none"> £500 	Ymgeiswyr i Adran y Gymraeg	Siaradwyr a dysgwyr Gymraeg	Oes
Ysgoloriaethau Chwaraeon	<ul style="list-style-type: none"> £1,000 y flwyddyn; Aelodaeth Blatinwm yng Nghanolfan Chwaraeon y Brifysgol; Pecyn o fuddion sy'n gysylltiedig â'ch camp. 	Ymgeiswyr o'r DU/ UE yn cynnwys uwchraddedigion	<ul style="list-style-type: none"> Rhaid gwneud cais i Aberystwyth erbyn 30 Mehefin, a nodi Aberystwyth yn ddewis 'Cadarn' ; Rhaid cyflawni holl delerau'r cynnig yn llawn. 	Oes
Ysgoloriaethau Pêl-droed Prifysgol Aberystwyth/ Tref Aberystwyth	<ul style="list-style-type: none"> £4,000 y flwyddyn ynghyd â buddiannau ychwanegol 	Ymgeiswyr o'r DU yn cynnwys uwchraddedigion	Rhaid bod gan ymgeiswyr brofiad o chwarae pêl-droed i lefel Prif Gynghair Cymru neu lefel gyfatebol	Oes
Bwrsariaethau Gadael Gofal, Gofalwyr Ifanc a Myfyrwyr sydd wedi'u dieithrio oddi wrth eu teulu	<ul style="list-style-type: none"> £1,500 y flwyddyn 	Myfyrwyr y DU sydd â phrofiad o un o'r categorïau hyn	Mae manylion llawn cymhwysedd a'r dystiolaeth sydd ei hangen ar ein gwefan	Oes
Ysgoloriaethau Cerdd	<ul style="list-style-type: none"> £650 	Holl ymgeiswyr yn cynnwys uwchraddedigion	Cerddorion talentog	Oes
Ysgoloriaethau Astudio trwy'r Gymraeg	<ul style="list-style-type: none"> Hyd at £400 y flwyddyn 	Myfyrwyr ar gyrsiau cymwys sy'n astudio nifer penodedig o gredydau trwy gyfrwng y Gymraeg		Nac oes
Ysgoloriaethau'r Coleg Cymraeg Cenedlaethol	<ul style="list-style-type: none"> Fel arfer hyd at £3,000 	Ymgeiswyr cyfrwng Cymraeg	Gweler gwefan y Coleg	Rhaid ymaelodi â'r Coleg Cymraeg Cenedlaethol

Am ragor o wybodaeth, ewch i'n gwefan:
aber.ac.uk/ysgoloriaethau

113328-1023

Yr Adran Marchnata a Denu Myfyrwyr

Adeilad Cledwyn,
Campws Penglais,
Prifysgol Aberystwyth,
Aberystwyth,
Ceredigion,
SY23 3DD.



+44 (0) 1970 62 2065



ysgoloriaethau@aber.ac.uk



Argraffwyd ar bapur
wedi'i ailgylchu 100%